

Кимки кечқурун Бақара сурасининг охирги икки оятини ўқиса...



16:30 / 10.03.2023 6719

Уйқудан олдин Оятал Курсий, Ихлос сураси, Муаввизатайн, Бақара сурасининг охирини ўқиш мустаҳабдир. Бу эътибор қаратиш муҳим бўлган ва таъкидланган ишлардандир. Бу борада бир неча саҳиҳ ҳадислар ривоят қилинган.

Икки саҳиҳ тўпламда Абу Масъуд Бадрийдан ривоят қилинади: «Расулуллоҳ соллаллоҳу алайҳи васаллам шундай дедилар: «Кимки кечқурун Бақара сурасининг охирги икки оятини ўқиса, унга кифоя қилади». Бир жамоа уламолар «кифоя қилади» деган иборани «кечаси қоим бўлишга кифоя қилади» деб изоҳлайдилар. Бошқалар эса «кечаси етадиган ёмонликларга кифоя қилади» дейдилар.

Оиша розияллоҳу анҳодан ривоят қилинади:

Набий соллаллоҳу алайҳи васаллам ҳар кеча Ихлос сурасини ва Муаввизатайнни ўқирдилар.

Али розияллоҳу анҳудан қуйидаги ривоят келтирилади:

«Исломга кирган ақлли бирор инсонни оятал курсийни ўқимасдан ухлаганини кўрмаганман».

Али розияллоҳу анҳудан қилинган яна бошқа ривоятда шундай дейдилар:

«Исломга кирган ақлли бирор инсонни Бақара сурасининг охириги уч оятини ўқимасдан ухлаганини кўрмаганман».

(Бунинг исноди Бухорий ва Муслимларнинг шартига кўра саҳиҳдир.)

Уқба ибн Омир розияллоҳу анҳудан ривоят қилинади:

«Расулуллоҳ соллаллоҳу алайҳи васаллам менга: «Бирор бир кечани Ихлос сураси ва Муаввизатайнни ўқимасдан ўтказмагин», дедилар. (Шундан кейин) мен бирор бир кечани Ихлос сураси ва Муаввизатайнни ўқимасдан ўтказмадим».

Иброҳим Нахаъийдан ривоят қилинади:

«Улар (аввалгилар) ҳар кеча ана ўша уч сура (Ихлос сураси ва Муаввизатайн)ни ўқишликни мустаҳаб билардилар».

Яна ушбу кишидан ривоят қилинади:

«Улар ётоққа ётган вақт Муаввизатайнни ўқишни таълим берардилар».